

04 MAR 2002

Kasitah-Akujanji

KEBINET DIJANGKA TANDATANGANI SURAT AKUJANJI RABU INI

TANJONG MALIM, 4 Mac (Bernama) -- Anggota Kabinet dan anggota pentadbiran dijangka menandatangani surat akujanji pada Rabu ini, kata Menteri Tanah dan Pembangunan Koperasi, Tan Sri Kasitah Gaddam hari ini.

Beliau berkata Perdana Menteri Datuk Seri Dr Mahathir Mohamad dijadual menandatangani surat akujanji itu di hadapan Yang di-Pertuan Agong Tuanku Syed Sirajuddin Syed Putra Jamalullail pada sebelah paginya.

"Kami, menteri-menteri akan menandatangani pada sebelah tengah hari di hadapan Perdana Menteri," kata beliau ketika berucap pada majlis perhimpunan bulanan kementerian dan penyerahan projek kampus Institut Tanah dan Ukur Negara (Instun) di Behrang Ulu.

Katanya, ia akan diikuti oleh timbalan menteri, setiausaha parlimen dan setiausaha politik.

Kerajaan sebelum ini telah meminta kira-kira 900,000 kakitangan awam menandatangani surat akujanji itu yang bertujuan memastikan mereka menjalankan tugas dan amanah dengan ikhlas.

Mengenai Instun, Kasitah berkata kos pembinaan dan pembelian kelengkapan teknikalnya menelan belanja RM135.5 juta dan institut itu akan mengambil penuntut mulai bulan ini.

Katanya, ia bertujuan memberi kursus kepada pegawai kementerian, pentadbir tanah, juruukur dan pemetaan dari seluruh negara.

Kasitah berkata, Instun juga sedang mengadakan perbincangan dengan Universti Teknologi Malaysia dan Universiti Putra Malaysia untuk mengadakan kursus berkembar di situ.

Kampus dengan keluasan 80 ekar yang terletak bersebelahan projek Proton City ini akan mengambil alih tugas latihan yang dahulunya dijalankan oleh Seksyen Latihan, Jabatan Ukur dan Pemetaan Malaysia.

Kasitah berkata, pihaknya kini merancang membangunkan fasa kedua di atas baki tanah seluas 48 hektar dengan projek pusat latihan bina semangat.

-- BERNAMA

AR NMO